

## **SARS, NPA go sekiša balefela motšhelo bakeng sa dipušetšo tša motšhelo tše di šaletšego morago**

**PRETORIA, 16 Aprele 2018** – Ditirelo tša Motšhelo tša Afrika Borwa (SARS) di thomile tlhomo empsha le Taolo ya Setšhaba ya Tshekišo (NPA) go sekiša balefela motšhelo ba go se obamele tefelo ya motšhelo, go akaretša badudi ba Afrika Borwa ba go hlomphega, bao ba paletšwego ke go romela dipušetšo tša motšhelo.

Balefela motšhelo bao ba hwetšwago ba le molato ba tla hwetša rekhoto ya bosenyi.

Tlhomo ye e šetše e bone kahlolo ya mathomo ka Port Shepstone bekeng ya go feta. Mrn. S Ragunat, bjale ka moemedi wa SPS Distributors, o lefetše faene ya go dumela molato ya

R5 600 ka Kgorotsheko ya Selete ya Port Shepstone bakeng sa go se romele dipušetšo tše di šaletšego morago tša go feta tše 50 tša Motšhelo wa Boleng bja go Oketšwa (VAT), Lefela-Ka Ge-O-Gola, (PAYE) le Motšhelo wa Letseno la Koporasi (CIT). O ile a laeletšwa go romela dipušetšo ka moka tše di šaletšego morago.

Go palelwa ke go romela pušetšo ya motšhelo goba pušetšo ya VAT ke molato wa bosenyi go ya ka Molao wa Taolo ya Motšhelo le wa Motšhelo wa Boleng bja go Oketšwa

Mo bekeng ya 16 go fihla ka 20 Aprele, dikgetsi tše seswai tša dipušetšo tša motšhelo tša go šalela morago di tlo tšwelela ka go dikgokologo tša go fapana tša dikgoro tša tsheko dikarolong tša go fapana tša naga – go akaretša dikgetsi tše nne ka Kgorotsheko ya Maserata wa Johannesburg ka 19 le 20 Aprele.

Go tlo ba le dikgetsi tše dingwe ka Ficksburg le Bothaville ka Free State, le ka Kgorotsheko ya Maserata wa Newcastle ka KwaZulu-Natal mo bekeng ka moka.

Khampheine ye e swaya maatlafatšo ya Protšeke ya SARS ya Dipušetšo tša motšhelo tša go šalela morago yeo e tlhomilwego mafelelong a ngwagola ge SARS e be tebile go dira temošo magareng a balefela motšhelo mabapi le dipušetšo tša motšhelo tša go šalela morago.

SARS mo mengwagengya go feta e mmalwa e itemogetše koketšo e kgolo ya go se amogelege ya go se romele dipušetšo tša motšhelo go ralala le mehuta ka moka ya metšhelo, go akaretša PAYE, VAT, motšhelo wa letseno la koporasi le motšhelo wa letseno la bomong.

Mafelelong a Matšhe 2018, Puku ya SARS ya Dipušetšo tša Motšhelo yeo e Šaletšego morago e laeditše gore balefela motšhelo bao ba amegago ba kolota SARS tekanyetšo ya 30 million ya dipušetšo, mo mabakeng a mangwe go laetšwa gore dipušetšo tše mmalwa di be di šaletše go molefela motšhelo o tee.

Sephetho sa go rarolla tiišetšo ya obamelo ka mokgwa wa tsheko ya bosenyi ke sephetho sa mafelelo. Balefela motšhelo ka moka bao ba tla tšwelelago ka kgoro ya tsheko ba be ba angwa pele ga nako gomme dikgopelo tša mafelelo tša tefelo di be di rometšwe go bona pele go ka tšewa magato a tatofatšo ya bosenyi. Mo kgatong ye ditokhete tše 36 di rometšwe go NPA

Palo e kgolo ya go theoga ga dipušetšo tša motšhelo e be e le enngwe ya ditaetšo tša go fokotšega ga obamelo ya tefelo ya motšhelo gomme se se ile sa tšweletšwa ke Tona ya Ditšhelete Nhlanhla Nene ka pego ya dipalopalo tša kgoboketšo ya letseno la motšhelo bakeng sa ngwaga wa tšhelete wa 2017/2018.